

NAQQIUT

Inatsisartut inatsisissaattut siunnersuut 11. august 2016 ullulerneqartoq taarsissavaa

(Inatsisartut Allattoqarfiannit innersuussuteqartoqarnerata kinguneranik inatsisissatut siunnersuutip kalaallisoortaani oqaatsitigut naqqiisoqarpoq. Inatsisissatut siunnersuutip qulequtaata oqaasertalernera, kiisalu inatsisissatut siunnersuutip kalaallisoortaani § 1, nr. 1, 2, 6, 7 aamma 10-mi kiisalu § 2, imm. 2-mi oqaatsitigut naqqiissuteqartoqarpoq. Kiisalu oqaaseqaatini nalinginnaasuni naqqiutit ilanngunneqarput)

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisissaat nr. xx, xx. xx 2016-imeersoq
(Aningaasaqarnermut Aatsitassanullu Naalakkersuisoq)

Saqqummiussissut

(Aningaasaqarnermut Aatsitassanullu Naalakkersuisoq)

Siullermeerneqarnera

Matumuuna akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut Naalakkersuisut sinnerlugit saqqummiutissavara.

Inatsisissatut siunnersuummi akileraaruserinermik ingerlatsinikkut allannguutissarpaaluit iluarsisutillu pineqarput. Matumuunalu allannguutaaneruset naatsumik eqqaaniarpakka.

Siunnersuut manna aqutugalugu akileraarutitigut allatigullu akiliissutaavallaarsimasut checkingorlugit tunniunneqartarunnaassapput. Tamatumunnga patsisaanerpaavoq, qallunaat aningaaseriviisa checkit pillugit suleqateqatigiinnerisa taamaatinneqarnera, taamalu 2016-p naaneranut unitsinneqarnissaa, taamaasilluni checkinik atuineq ajornakusoornulissaaq. Tamatumalu saniatigut checkit akiliutitut atorneqarnerat piffissami sivisunersusumi annikilliartuinnarsimavoq. Innuttaasut siunissami aningaaserivimmi kontotik akileraaruseriffinnut nalunaarutigisalissavaat, akileraaruseriffiit ikitsivigisinaasassaannik. Taamaaliortoqarsinnaasassaarlu nammineerluni nalunaarsugassap immersorneranut atatillugu, qarasaasiakkut Sullissivik.gl aqutugalugu imaluunniit suliamut aalajangersimasumut atatillugu.

Ullumikkut nammineerluni nalunaarsugassat tunngaviusumik tamatigut maajip aallaqqaataani tunniunneqartussaapput. Sulisitsisut kukkunersuisullu uparuaatigisimavaat, tamanna kukkunersuisartunut naatsorsuuserinermillu suliaqartunut annertuumik suliakkersuutaassasoq, inuussutissarsuteqarfimmi naatsorsuuserinikkut namminerlu nalunaarsuinikkut suliaqartarmata. Taamaammat inatsisissatut siunnersuutikkut namminersorlutik suliffeqarfiutillit, piginneqatigiiffiit aningaasaateqarfiillu qarasaasiakkut nammineerlutik immersuisalernissaat nutaatut eqqunneqarniarpoq.

Inatsisissatut siunnersuummik suliffiutillit piumaffigineqalissapput, sulisorisamik soraarnerussutisiaqalernissamut nunani allani aningaaserivinnut akiliutai pillugit nalunaaruteqartalernissaannik. Nalunaarsuutit tamakku innuttaasut akileraarutaasussatut akiliisimanagerat pillugu, taamaalillutillu soraarninngorunik akileraarutaasussaangitsumik pissarsinissaanni piumasaqaataasussanik uppernar-saatissaqalernissaannut pingaarnernut atorneqassapput. Tusarniutaasunut akissutaasut tigusimasat toqqammavigalugit siunnersuutigineqassaaq, inatsisissatut siunnersuutip immikkoortua taanna aatsaat 1. januar 2018-mi atuutilersinneqassasoq. Taamaaliornikkut suliffiutillit akissarsialeriner-mi piumasaqaatit nutaat toqqammavigalugit aqqiiniarnissaminnut periarfissaqarneruniassammata. Taama-tut kingusinnerusumik atuutsitsilernissami soraarnerussutisiaqarnissaminnut ileqqaaruteqartut eqqugaassanngillat.

Akileraartarnermut Aqutsisoqarfiup akileraarutitigut paasissutissat pillugit nunarsuarmi suleqate-qarnermigut, ilaatigut aningaasateqarfinnik suliffeqarfinniit paasissutissarpaalussuit pissarsiarisarpai. Inatsisissatut siunnersuutip matumani paasissutissatigut illersugaanissap isumannaallisaaffiunissaa siunertarivaa, tassalu aningaasaateqarfinnik suliffeqarfiit akileraartarnermilu ingerlatsiviit piumaffiga-lugit, paasissutissatigut isumannaallisaatit arlaatigut ajutooraluarpata kikkut eqqugaanissaat eqqarsaatigalugit.

Tamatuma saniatigut Inatsisissatut siunnersuut akileraaruseriner-mik ingerlatsiviit pillugit inatsisikkut annikinnerusutigut iluarsisuteqarfiuvoq, tassalu Kommuneqarfik Sermersuup KANUKOKA-miit anineranut atatillugu. Ilaatigut tamatumunnga attuumassuteqarpoq Skatterådimit ilaasortassanik toqqaasarneq.

Naggataatigullu Inatsisissatut siunnersuummut oqaaseqaatitaanullu innersuutissavassi.

Taamatut oqaaseqarlunga Naalakkersuisut sinnerlugit siunnersuut Inatsisartunut suliassanngortippara.